

四庫全書

史部

欽定四庫全書

聖祖仁皇帝親征平定朔漠方略卷四十

閏三月辛巳朔

遣使

勅訊第巴先是第巴遣使尼麻唐庫圖克圖卓爾磨  
隆堪布具疏密奏云為衆生不幸第五世達賴  
喇嘛於壬戌年身故事自

聖主車書一統癸巳年赴京講信修睦以來此地法門

最大者達賴喇嘛也世間最大者

昊天日月大施主也百凡情事非不有心陳奏而奉太  
卜大護法巴賴奔柰冲之語但召近侍之人如  
達賴汗達賴巴圖爾等告之自此以外各於親  
近直至今年不得告語雖有心陳奏此情但奉  
達賴喇嘛之旨及護法柰冲之言甚為嚴切是  
以未能陳奏伏祈

睿鑒第六世轉生靜體因有避忌尚未放叅俟至其

年月日時奏聞

昊天至尊大施主後再諭衆聞知為此遣尼麻唐庫圖克圖卓爾磨隆堪布等前往密奏伏祈

睿鑒屢頒訓諭茲具伴疏禮儀欲

昊天大施主便於供養以其停骸牀簀之鹽拌和塑成達賴喇嘛遺像謹以上獻尼麻唐庫圖克圖等口奏云老達賴喇嘛成年已故小達賴喇嘛生今年十五本地仗達賴喇嘛以存達賴喇嘛身

故之時即欲奏

聞恐生他變且有喇嘛遺言及巴賴奔柰冲之言必至相合年歲始聞之

天朝皇帝及衆施主故於今年十月二十五日方出定放叅第巴為此遣我等行時令於佛前立誓必親見

皇上密奏若於他處俱令以達賴喇嘛出定相告未嘗明悉其故

上隨將彼奏章及所獻達賴喇嘛之像於原封之外面  
同伊等加封押以鈐記而

諭之云朕數年來久知達賴喇嘛已故若達賴喇嘛  
尚存則僧巴秦布庫圖克圖噶爾丹西勒圖齊七  
克達賴堪布濟隆庫圖克圖等斷不如此妄行喀  
爾喀厄魯特亦不致破壞故朕降旨切責之今第  
巴翰誠吐實密以奏朕朕亦為之密藏將俟十月  
初旬啟封宣示內外四十九旗喀爾喀諸部落令

為已故達賴喇嘛誦經致賄為小達賴喇嘛遣使稱賀乃撰

勅遣主事保住等往

諭第巴於二十九日清晨遣行至是司務英沽自策

旺喇卜灘使歸奏云臣接部發策旺喇卜灘咨

文賞至策旺喇卜灘所策旺喇卜灘大喜即遵

旨領兵來勦噶爾丹行至薩克薩忒呼里克二十日

程之地有達賴喇嘛使人達爾漢厄木齊言達

賴喇嘛身故已十有六年矣小達賴喇嘛方十  
五歲爾等當各居其地不得興兵遂按兵而退  
臣英沽知其不能復行亦還達賴喇嘛之事西  
北諸人皆已聞之是日副都統阿南達奏至疏  
稱噶爾旦多爾濟遣人來告云達賴喇嘛之善  
巴陵堪布於三月二十五日致我一札令我赴  
彼盟會我以向不與彼盟會是以不往謹以其  
書呈覽視其書乃唐古特文其詞云達賴喇嘛



第巴兩人遣人諭青海諸首領俱於正月二十  
八日在察罕托落海地方會盟繕修器械爾可  
令爾屬下人亦繕修器械於來月初四五間晝  
夜兼行務期必到期會之地疏至

上命將善巴陵堪布致書之意下議政諸臣集議議曰  
達賴喇嘛遣使尼麻唐庫圖克圖等請

安密陳機務第巴復遵

諭陳言情詞恭順是以

皇上特沛溫綸遣我使與尼麻唐庫圖克圖偕往今以  
善巴陵堪布致書噶爾旦多爾濟觀之則與達  
賴喇嘛所奏本意不符無故會青海諸台吉繕  
修器械又約從來未與盟會之噶爾旦多爾濟  
其意叵測且策旺喇卜灘親領兵往勦噶爾丹  
之時第巴曾遣人撤回以此觀之第巴仍黨噶  
爾丹而誑我其跡顯然噶爾丹者窮寇殘寇必  
當撲滅之者也凡俘獲者論功助彼者即吾敵

也恐第巴以彼所居遼遠謂我不知其詭計應  
令所司詳列此情追發尼麻唐庫圖克圖等併  
檄主事保住等將此情由詢明第巴來奏議上  
上從之

壬午

厄魯特津巴車爾貝來降副都統阿南達疏至  
言三月初五日臣遣家人尼楚滾渣木素往哈  
密偵探語之曰聞噶爾丹之津巴車爾貝來來

則擒而致之十七日尼楚滾歸告曰我等於初九日至哈密以內昭呼都克地方遇前所遣駐劄哈密之家人海喇圖解送津巴車爾貝一同前來問津巴車爾貝答曰噶爾丹謂我受

中華皇帝勅書以為叛彼曾被拘執正月初一日彼遣十五人躡覓塞卜騰巴兒珠爾以我授之帶至瀚海止給馬一匹棄之而去我於是步行向哈密而來我來時噶爾丹仍在格格忒哈郎古忒

地方兵不過五六百名馬駝之外竝無牛羊又  
曾遣人名哈世者往探洪郭羅人等情形尚未  
歸來噶爾丹口中但云俟格壘而已前者噶爾  
丹與我閒談言

中華皇帝若堅

諭格壘仍前修好查還失散之人我等猶可苟延如  
不招降無甚修睦之

旨必不能棲於此地矣蓋其勢似必向洪郭羅伊濟

根等處而去此兩處未知焉往殆俟往洪郭羅  
之使哈世歸時乃定也臣思噶爾丹之兵不過  
五六百所乘馬駝外竝無他畜正急遽擾亂不  
知所為之際我

皇上睿謨周至曾

諭臣相機進兵臣料其斷不能出

皇上廟謨之外不勝欣躍臣現駐劄布隆吉爾地方請  
俟孫思克博濟兵到後即竭力進征以圖報効

為此驛解津巴車爾貝前去謹此奏

聞

上命示議政大臣著以津巴車爾貝交吳達禪喇錫訊  
明來奏

厄魯特台吉滾布察罕來降理藩院奏曰據副  
都統阿南達咨言降人厄魯特台吉滾布察罕  
訴云某來歸

聖上盆楚克台吉取我人畜留之隨檄盆楚克台吉云

今來歸

聖上爾乃留其人畜是何故耶著速照數查還益楚克  
台吉言往歸

聖上之人我何敢留之但滾布察罕等前曾盜我屬下  
人畜又有借欠宿逋計數取償是實又有不願  
人等擅自逃去者皆圖賴我留之耳今承鈞諭  
將現在人口即行差人解還計三十八口以此  
問之滾布察罕訴云先是一百二十許口內自



盆楚克處未起行之前十六人逃至名畢賴之  
人家向此來時又有俄申等八人亦逃至畢賴  
家至察罕達爾漢所居俄倫布拉克又四人逃  
去現在盆楚克所者仍有三十八口馬二十四  
匹在畢賴所者有厄魯特人二十四口西郎古  
特人二十一口於是復遣通事韓福賡文赴盆  
楚克等訊之韓福歸稟曰某等至盆楚克家問  
之云盆楚克赴青海之盟去矣即以公文授盆

楚克下人達爾扎送其父阿齊巴魯爾台吉遣人來覆云我子赴盟去矣滾布察罕之人盜我子牲畜罰取之者也又至畢賴處諭之畢賴言我何敢取歸降

皇上之人俄申等十一人逃在此西郎古特者因盜達賴備賞牲畜盟壇會審聞於達賴喇嘛罰取之人其根敦等十四口久係掠取之人亦達賴喇嘛所轄此輩我不便擅還但將俄申本身男子

四人婦女二口童男二人童女二口給發及察罕達爾漢處所有男子二人女一口共十四口又畢賴回文一併帶到畢賴回文云此等人口俱因偷盜財物罰取已久皆屬達賴喇嘛我不得擅給為此將伊人口共一百二十五名交送山西巡撫咨部伏乞轉奏茲據咨轉奏報

聞

副都統阿南達奏報策旺喇卜灘率兵禦噶爾

丹阿南達奏言策旺喇卜灘咨稱來文俱已備  
晰倘彼從此地過必不使之脫出已遣阿玉什  
之子臧濟扎卜率兵二萬起行矣又備文開明  
諸事原由差諾海賚送爾矣又我使人往土魯  
滿聞汗之子已往哈密汗所親率不及千人漸  
往哈密留下衆人止率兵五千至呼達波汗處  
逃來者二人言汗本身原在格格特哈朗古特  
以額克阿拉兒有魚欲遷往彼地故今至泰什

里地方又我差探博碩克圖汗所在哨卒遇逃  
來人哈爾垓殿額爾克擒之前來言博碩克圖  
汗本身仍在格格特哈朗古特其他俱無食四  
散又額貝都拉致書於哈爾垓殿額爾克以告  
博碩克圖汗之言曰

中華皇帝使臣來已二三次矣渾台吉使人之來亦二  
三次屢索其子彼處使人我已面見語之曰我  
之意仍照前而已非如爾等游牧之人恐伊等

之狀又將遣使來也如欲問信於我可令爾使人至土克里克坐待覆音伊等使人若回去即至沙爾見我云我欲探明博碩克圖汗去向已留下兵馬一枝因我游牧地方近於白帽故已回去奏入

上以示議政諸臣

命運米至白塔

上諭內大臣福善索額圖等曰大兵行期暫緩米應先

運至白塔爾等會同運米左都御史于成龍將所  
有船隻酌留渡口備用外其餘船隻盡行載米運  
往但此地水手操船運米不甚諳練黑龍江之兵  
頗習於船可發二百名令率本地水手乘此時裝  
運二次其大兵所携四個月口糧俟至白塔再行  
散給令各帶去甚有裨益于成龍等集議曰

聖算無遺臣等祇遵無復他議除留船二十隻令備渡  
口外所餘大小船共一百三隻一次可載米三

千石應將于成龍等隨軍遞運之米盡載入船  
再將將軍馬思喀兵所携四個月口糧內酌撥  
上船作兩次運送

上報可問于成龍曰爾等裝運米船作何調度于成龍  
奏曰請以船十五隻交地方官一員及臣等隨  
行官員二員同押以便約束水手米分為六隊  
頭隊喻成龍二隊范承烈三隊王國昌四隊辛  
保五隊李鈞六隊喀拜前後臣親身總督之俱



自寧夏散趕駝馬至於白塔地方再各收所運之米自陸路運往

上曰是米糧關係緊急爾等當從多帶往至隨駕大小官員殷實之人除各帶自己口糧外有願將官米或數石或數斗隨力攜帶者各令攜帶至於白塔撥給兵丁爾等諭衆通知以願帶之人及所帶米數奏聞先是

上以新滿洲二十人給予成龍使之隨材調用至是于

成龍覆請曰

皇上所給新滿洲二十人何處調用口糧何處支給  
上曰此二十人可令搖船運米至陸路後隨材用力伊  
等口糧即載船中帶去至汝等所帶旗員情願効  
力者甚少恐差遣不敷今採買牲畜之御史顧素  
等及隨駕部院官員並無所事著令押運米糧併  
去歲運米者爾等亦具奏帶往

癸未

以諭諸部落保護哈密檄知額貝都拉副都統阿  
南達疏言額貝都拉達爾漢白克呈稱策旺喇  
卜灘遣使吳爾圖勞章賚文詰問云博碩克圖  
汗處發來事務爾等不明示我其與塞卜騰巴  
兒珠爾等見執之人甚多而不遣一人於我亦  
不使聞其情事且爾又令人押我使一概不許  
相見此項諸事果是理乎今可速將爾所執人  
內擇出一人與爾使來再將塞卜騰巴兒珠爾

與我使一見其餘皆送往圖魯滿口授之言已  
語使人矣我對之曰噶爾丹處發來諸事我並  
無所欺隱其塞卜騰巴兒珠爾等人理應解送  
皇上故交侍衛阿南達之使與我子白奇一同解去此  
爾使所目覩也至汝之人每誘蒙古之人逃竄  
是以一概不令相見耳其來使口致云阿南達  
書言爾已降中國其中國迫汝使降耶抑爾自  
願降耶我對之曰

皇上未嘗迫我第遣人移文稱

聖諭云前爾雖附噶爾丹今當從朕後又令我擊噶爾丹其人來則擒之我是以心悅誠服而降

聖上也策旺喇卜灘謂我已降

皇上既已大怒又以我擒獻其種類故凡我使人皆拘執之不使得還今我所擒約七十餘人策旺喇卜灘必來索取倘致興戎内外未必無虞是宜預為籌之也疏入

上命議政大臣集議議曰前因額貝都拉達爾漢白克  
已降

聖上而策旺喇卜灘及青海諸台吉下人不之知也未  
必不肆行侵擾應檄策旺喇卜灘及青海諸台  
吉各將下人嚴行約束勿得侵擾哈密回子可  
也已經行文在案請以此諭額貝都拉知之併  
檄額貝都拉如策旺喇卜灘索取爾處所有之  
人斷不得擅發

上從之

命黑龍江軍中馬匹放青

上諭內大臣公福善索額圖馬思喀大學士伊桑阿曰  
黑龍江之兵効力之心切故薩卜素自稱馬匹臆  
壯而已朕今日巡城見黑龍江軍中馬匹臆色甚  
欠此馬乘歸難以得到伊等若有出行之事朕當  
給馬使騎其將伊等之馬一千七百匹令於察罕  
托海之地牧放遣人送往歸化城征行既畢各乘

已馬以歸其土則易到也如此草料有餘而馬亦有益其會同薩卜素集議以聞議曰此馬在察罕托海地方牧放請以三百匹為一羣共五羣每羣用綠旗兵十五名牧之以總兵官王化行標下叅遊等官才能者二員領之再令將軍薩卜素派出每翼章京各一員每旗兵各二名協同監牧此馬既趕解歸化城應檄歸化城都統派出副都統一員叅領二員及官兵趕至歸化城四



圍牧故事竣之日以便各乘其馬歸彼本汛如  
此則草料有餘而於馬亦有益至將軍薩卜素  
在此地拴騎之馬五十匹仍支草料喂養俟  
命下之後即發伊等之馬往察罕托海牧放

上曰此馬趕到察罕托海令與達禮善等所牧馬一處  
牧放餘依議

提督李林隆請調兵二千分守大黃山之西

允之李林隆疏至言奉兵部咨稱甘肅等處地方甚

屬緊要目前將軍孫思克博濟統領大兵進薩克薩忒呼里克搜勦噶爾丹應令提督李林隆仍駐守甘州議政大臣議奏奉

旨准行查大黃山東方有涼州總兵董大成足以防守大黃山西方所有肅州總兵官屬下地方皆屬緊要需兵甚多河西地方累年以來挑用兵馬其馬不可以為不乏臣現調馬兵二千分守以副

皇上西顧之意其調到兵馬俟將軍孫思克回汛之日

臣即當發還固原疏入

上從之

命動支正餉採買馬畜以備軍需副都統阿蘭泰等  
疏至言平涼買牲郎中朱蘭泰動支正項錢糧  
採買駱駝七十頭馬一百二十五匹又朱蘭泰  
自價買助馬騾三十匹上項駱駝馬騾俱交地  
方官訖寧夏買牲御史顧素郎中敖海員外沙

里布等買得馬騾一百三十一匹羊一萬六千  
五百隻又顧素自價買助馬五十匹敖海助馬  
五十匹沙里布助馬三十一匹上項俱交地方  
官訖疏入

上以之付所司

甲申

厄魯特人額林辰哈什哈等來降大將軍伯費  
揚古疏至言侍郎滿丕谷稱噶爾丹下諾爾布

寨桑族兄額林辰哈什哈等共十三口來降問  
額林辰哈什哈曰汝逃來時噶爾丹在何地告  
曰我等未來之前噶爾丹原在薩克薩忒呼里  
克丹濟拉移往齊察蘭去矣問曰齊察蘭距噶  
爾丹所居有幾日程爾同來之台吉達木林之  
妻布尼塔爾者即杜噶爾阿喇卜灘之弟達木  
林之妻否告曰我在台西勒地方居住是以噶  
爾丹聲息一無所聞我姊之子額木特爾乃丹

濟拉之壻拉斯倫屬下人常在拉斯倫左右議  
事顧木特爾告我曰丹濟拉曾遣唐古特相約  
同降又彼下人紛紛言曰西有

聖上之兵東有根敦帶青之兵我輩無所逃矣齊察蘭  
地方去噶爾丹所居之地有兩日程布尼塔爾  
即杜噶爾阿喇卜灘胞弟達木林之妻即我伯  
父之女於我為妹云除妻子人口及布尼塔爾  
等交送歸化城外相應將額林辰哈什哈解送

據咨具奏

上以示議政大臣其丹濟拉與噶爾丹如何離散之故  
交吳達禪喇錫問明來奏隨問額林辰哈什哈言  
丹濟拉因撻噶爾丹近侍額木齊是以離散

甘肅巡撫郭洪奏報師期郭洪奏言准行兵部  
咨稱會議噶爾丹窮迫鼠竄餘黨不過數百大  
兵進剿即可撲滅現在肅州預備西安滿兵二  
千每人各有私馬三匹此二千兵內除去家貧

者五百名外於此兵五百名之馬一千五百匹  
及撥孫思克兵餘剩之馬五百匹巡撫郭洪採  
買捐助一千許馬駝內揀擇臚壯者如或不足  
令該撫會同孫思克於文武官不出征綠旗兵  
丁內擇馬騾臚壯者給此滿洲一千五百兵每  
人二匹前往征勦毋失機會至所採買牛羊別  
無用處俱著帶去其採買捐助馬內臚瘦者給  
留下五百滿兵喂養等因到臣查前進之兵一



千五百名以每人給馬二匹算則留下五百滿  
兵之馬一千五百匹及撥給孫思克兵餘剩之  
馬五百匹外併計將軍博濟後請砲手坐馬共  
少馬一千一百十二匹將現到捐助採買馬駝  
內臚壯者撥給其不敷者移會將軍孫思克差  
官往取附近不出征綠旗營之馬今將軍孫思  
克博濟覆稱往取附近綠旗兵之馬不能一時  
即得進兵日期甚急故將現得臚壯牲口數百

俱給副都統等撥給兵丁一面令其起行前來  
我等計馬減兵起程等語是以現到採買捐助  
馬駝內揀擇臚壯者共四百七十二匹交副都  
統席爾哈達馬雲霄撥給前進兵丁其拴帶百  
日口糧臣早已預備肅州外今米袋馬騾鞍架  
駱駝鞍屉等物俱已撥給副都統席爾哈達馬  
雲霄所缺馬數減滿洲綠旗兵八十名給前進  
滿兵每人二匹官兵已於閏三月初一日自甘

州起行至捐助採買馬匹內臆瘦者三百四十  
五匹及管理茶馬郎中李學聖後換解到瘦馬  
一百十六匹俱交留下滿兵喂養西寧莊浪採  
買未到馬匹隨到即補給留下滿兵已交付道  
員金秉倫訖採買馬三百十二匹羊七千隻俱  
發隨滿兵綠旗兵訖臣到肅州督視官兵自肅  
州起行其日期另行奏

聞外今將官兵自甘州起行日期奏

聞

上以發該部是日遣內大臣公常泰

諭祭提督陳福其子陳世濟率族人至

行宮謝

恩

乙酉

授法爾庫為藍翎侍衛

上諭內大臣曰法爾庫為前鋒巡哨時遇厄魯特三十

餘人來圍之射倒一人兩人得傷而走於是得出敵皆異之法爾庫人材偉健而且善射着授藍翎侍衛

追回尼麻唐庫圖克圖主事保住先是以第巴沮止策旺喇卜灘之兵及約噶爾旦多爾濟會盟之事追發尼麻唐庫圖克圖保住使訊第巴至是

皇上又命追尼麻唐庫圖克圖保住還尼麻唐庫圖克

圖保住至

諭保住等曰第巴於朕諸諭旨無不順從彼又諄請  
溫諭是以朕遣汝等傳致溫諭既經遣發汝等勅  
文及口諭俱無庸更改但以青海善巴陵堪布致  
書於噶爾旦多爾濟及第巴差達爾漢額木齊於  
策旺喇卜灘阻止策旺喇卜灘之兵又我英沽使  
於策旺喇卜灘歸奏達賴喇嘛身故之事俱已傳  
播是以追回汝等使以情由問之尼麻唐又第巴

所獻佛像奏章連封交尼麻唐拆視乃泥塑達賴喇嘛其頭已斷此項情由汝等可宣問第巴保住爾年甚少可將轉生之小達賴喇嘛看明回來如不令見則已尼麻唐庫圖克圖密請云達賴喇嘛身故已十有六年矣達賴喇嘛再生年已十五今歲十月二十五日出定此際乞聖主秘之無使宣露朕原允第巴所請今英沽歸言策旺喇卜灘諸人已悉聞知始通行曉諭可於途中告所遇之人

將諭旨內始末亦皆曉諭之是日

上諭皇太子曰前尼麻唐庫圖克圖等到其中情由彼甚秘密未經開明今事悉昭著故詳開始末尼麻唐庫圖克圖到後朕念達賴喇嘛舊好體其秘密之意將第巴奏章及所獻達賴喇嘛之像於原封上在伊等前加封押以鈐記遣主事保住賁勒往諭第巴二十八日引見二十九日起程之後司務英沽還奏言達賴喇嘛身故之事西北之人俱已



盡知是日阿南達又奏言善巴陵堪布遣人致書於噶爾旦多爾濟令其繕修器械來赴青海之盟如此則朕雖欲為達賴喇嘛秘密其事亦徒然耳且以當詰之事甚多故追回尼麻唐庫圖克圖諸人令諸臣傳諭曰爾等秘密之事朕念達賴喇嘛之情深秘之概不以之告人今爾使達爾漢厄木齊等皆已傳播遍處聞知朕獨秘之何益之有爾等可與喇嘛等公同啟封將奏章并達賴喇嘛之

像觀之於是此地諸喇嘛同尼麻唐庫圖克圖親  
啟封視之乃泥塑達賴喇嘛之像其首離項墮在  
一旁是時諸喇嘛及衆大臣凡共聞共見之人無  
不驚訝以為此事若伊等去後開之或於十月開  
之而見其如此豈不為我詬耻天心每與聖主符  
合正當尼麻唐去猶未遠而英沽之事適到仍使  
其親見此事始末則皇上之誠信及優待達賴喇  
嘛之心亦昭著矣十六年以來假托達賴喇嘛之

言其事顯露達賴喇嘛果其有知亦當感戴聖上而不能不致憾於第巴也於此可以知第巴之肆惡於土白特國不必言矣蓋無人不驚異者而尼麻唐庫圖克圖輩心神失措驀然倒地口不能言但自悵云此我輩不祥之兆也即上項情事觀之此十六年間本朝出差之喇嘛輩欺誑本朝已極不足取信皆狗第巴無一實語其中丹木巴塞爾濟堅稱親見達賴喇嘛尤為可惡皇太子可率理

藩院官員將默爾根綽爾濟以下喇嘛等俱傳集  
旃檀寺告之以其故拏丹木巴塞爾濟并其徒俱  
禁理藩院中其兩處所有房屋俱令封守可呵責  
默爾根綽爾濟及衆喇嘛曰今年初一日朕躬及  
皇太子俱在彼問及默爾根綽爾濟倡言達賴喇  
嘛尚在今何以實跡顯露耶以此觀之養犬尚能  
吠生人猶為有益養爾等喇嘛竟無所益併查此  
十六年來差赴西域之喇嘛逐一取供來奏諸喇

嘛所作何狀亦當寄聞上項情事令滿大臣俱閱之敬請

皇太后安口奏大略以聞

以發大將軍伯費揚古用剩銀兩仍留將軍軍前先是

上命發銀五千兩送至大將軍費揚古所酌買皮襖牛羊等物頒給兵丁尋大將軍分給兵丁訖軍中俱有兩月糧糗尚餘銀二千四百兩以為應送交

右衛令西路同知唐凱收貯咨理藩院轉奏

上諭曰此銀仍留大將軍費揚古所有用則用俟便檄  
之是日

上諭皇太子曰朕至寧夏將十日矣每日籌畫兵馬糧  
餉之事略無刻暇途中晨則蒙霧露晝則冒塵沙  
口疲於督責手敝於轡策而來此數千里之外者  
亦為此嚙爾丹一遺孽也朕於此時倘在京城非  
不能朝玩名花晝坐樹陰以聽鳴鳥熱則息涼則

行安樂為上也亦以此志欲展丈夫之心胸耳恐  
皇太子純孝之人見花見鳥見魚見獸必念朕砂  
磧窮邊之勞苦而惻然心痛也其勿為朕憂但日  
夜盡心於國家之事暇則觀經史前代之得失以  
抒爾懷又

諭曰朕至此地即以儀器測驗較之京城北極低一  
度二十分東西遠二千一百五十里以此付安多  
照法推算原謂日食九分四十六秒乃是日大晴

測驗之食九分三十幾秒並不昏黑見星自寧夏  
視京師在正東而稍北初三日雨聊以寄爾知之  
其以告滿洲諸大臣又沿途自定邊至寧夏皆砂  
磧無草鹹蒿鹹刺沙蒿度笈草之外皆鹹與鹹寧  
夏四周皆稻田引黃河之水以耕不用栽插地方  
水土不甚佳於人不相宜恐皇太子欲聞之雖無  
用而書此沿黃河邊外牧地甚佳故我軍之馬悉  
驅而牧之乃青草馬可飽也



臣按自古聖帝明王未有不憂勤惕厲而能  
躋於邳隆者也堯曰我瘦天下肥大禹惜寸  
陰文王自朝至於日中昃不遑暇食皆是物  
也我

皇上子愛元元惟恐一人之不安耕鑿乃以噉爾丹肆  
虐屢犯邊陲致我塞外人民每遭驚擾以故  
赫然震怒

親統六師舍臺沼禽魚之樂任櫛風沐雨之勞籌兵

措餉

旰食宵衣由是觀之先聖後聖其揆一也伏讀

勅賜

東宮

上諭旨遠情深

聖主明訓誠可謂要而不繁矣

丙戌

多羅額駙阿喇卜灘奏報青海諸台吉受盟期

約之事先是

上遣多羅額駙阿喇卜灘喇嘛商南多爾濟內大臣杜思哈爾司業薩爾圖員外二郎保等往說青海諸台吉來朝阿喇卜灘等奏曰阿齊滾布巴圖爾台吉目今遣馬穆特來請

皇上萬安問之馬穆特告曰阿齊滾布巴圖爾台吉雖未嘗有決計歸降來朝

皇上之言但宣

皇上恩旨我台吉當無言不從也以此觀之阿齊滾布  
巴圖爾台吉已向我矣應先往阿齊滾布巴圖  
爾所說之

上是之至是阿喇卜灘等奏曰臣等奉

旨起行先遣國子監助教通奇塔特帶來使馬穆特  
往阿齊滾布巴圖爾台吉所告之曰我遣使於  
策旺喇卜灘等處時爾遣人護送資助駝馬以  
此我

聖上大加獎許差給

恩賜我等隨至矣臣等於三月十六日至甘州十七日通奇塔特回覆云大臣之言俱已告阿齊滾布巴圖爾台吉矣台吉云目今達賴喇嘛處遣綏本阿喇木扎卜為建塔之事於青海之察罕托羅海地方會盟我遣長子額爾德尼額爾克往中途聞達賴汗之子拉藏卓尼綽爾濟等欲乘此會盟執我而興兵是以退回我亦聞是語

而與諸子商之因遣我次子盆楚克赴是盟盆  
楚克歸告曰會盟之地拉臧言汝貳於我遣馬  
穆特請

中華皇帝之安非叛青海乎我荅言遣馬穆特者因  
聖駕近臨寧夏故我乘便先遣人請

安則有之然我並未嘗叛達賴喇嘛之教也今我所  
遣馬穆特若受其符信而來我等情甘認罪倘  
無符信則當何如以是荅之而歸目下拉臧仍

欲來伐我亦集吾人備之互設哨探爾以此往  
告爾大臣可也故臣等復遣通奇塔特親身驪  
閱其互設哨探之地且告以我等隨後即到阿  
齊滾布巴圖爾台吉處之意臣等於本月二十  
一日出永固城界阿齊滾布巴圖爾台吉即遣  
馬穆特等來迎云我台吉遣我等來告大臣目  
下青海諸台吉方在疑我若大臣不臨我地則  
羣疑當自息矣餘皆如通奇塔特語是以臣等

共議觀阿齊滾布巴圖爾台吉有畏懼諸台吉之狀我若前往恐不利於彼况彼已係服從之人故臣等依其言不復親往但遣員外郎二郎保往

諭給賞詳視情形並驗伊等兩家集兵之事二郎保通奇塔特等齊至郭滿諾門汗廟追及臣等通奇塔特告曰我前至阿齊滾布巴圖爾台吉所之時路旁有集兵之帳後往彼時所集人已撤



其帳亦無矣以問之阿齊滾布巴圖爾台吉告  
曰是月十九日拉臧遣使來告云請

聖上安青海諸台吉原欲會同遣使今巴圖爾台吉獨  
自希寵遣馬穆特請

安乃衆人閒論之語何特推我一人我不之答而遣  
回矣二郎保告曰我於本月二十三日至阿齊  
滾布所彼云我當出廬外跪聽

諭旨但因衆人皆疑我我欲於坐處跪聽

上諭受賞二郎保即令彼跪於坐處宣

旨賞畢阿齊滾布巴圖爾台吉喜云既蒙

御賜當與衆分而服之乃散給其子弟二郎保問拉臧  
有備兵遣使之事否阿齊滾布所答亦如對通  
奇塔特之語我又周視之無集兵之事是日諾  
門汗出庭迎接手執信帕恭請

聖安後頒

御賜信帕宣

旨畢諾門汗覆奏云我乃山野微末沙門於

皇上之前並無異常効力顯著勞績之處蒙

皇上矜我衰髦沛以

恩綸錫以香信此身雖不能仰報賴有僧徒千衆日

誦經懺虔祝

聖壽以答

皇恩而已今我雖患病然我本懷原擬望見

天顏當竭力調治痊愈之時務必往朝也是日諾門汗

遣人來告曰我喇嘛言

皇上遣諸大臣來者不過欲令青海衆生得享安樂永  
受恩澤之美意也令我與扎什巴圖爾拉藏及  
善巴陵堪布以及達賴喇嘛所遣之綏本阿喇  
木扎巴等一一曉諭即以此傳諭衆人皆言願  
往受盟二十八日善巴陵堪布等遣人來告云  
我等聞

欽差大臣已至西寧但當春時牲畜羸瘦衆台吉等恐

於本月初旬不能齊集請於閏三月初八日前  
後到來臣等許其初八日前後來會臣等俟親  
與青海諸台吉會盟事定後另奏外謹具奏  
聞

上以示議政大臣是日

遣大學士伊桑阿

諭祭故將軍趙良棟其子趙宏煜率其族人赴

行宮謝

恩

丁亥

青海台吉博碩克圖濟農奏請招撫噶爾丹

不許多羅額駙阿喇卜灘等疏言本月初二日西寧

總兵官韓弼差千總通事馬一善送到博碩克

圖濟農咨文問之馬一善稟云我河州副將李

鳳祥同將軍孫思克出兵之前差善至青海博

碩克圖濟農所探聽驗視有無噶爾丹之人且

語博碩克圖濟農曰爾乃噶爾丹之親說之使  
降我為妙三月初九日博碩克圖濟農自察罕  
托羅海歸其地善即以此言告之博碩克圖濟  
農未經回覆至十七日羅壘額木齊請

上安而回博碩克圖濟農問明後即喚善往當其第四  
子車陳帶青楚呼拉寨桑之前謂之曰前我下  
人同噶爾丹之人被擒我意中以為俱已殺之  
矣後蒙

皇上釋歸今又遣羅壘額木齊同大臣來使於我真

聖仁之主也又問汝之來甘州將軍西寧總兵官知之  
乎善言將軍總兵官皆知之博碩克圖濟農遂  
令以印文送將軍且言將軍若遣的當人來我  
此地遣人殆可招之使降也噶爾丹從吾言我  
使人引噶爾丹面

聖也臣思

皇上仁聖博碩克圖濟農歸化欲撫其姻家噶爾丹而



送印文來理合奏明請

旨而行但將軍孫思克之兵已經啟行如或遲緩恐  
失機會故遣員外二郎保筆帖式傅昌等與博  
碩克圖濟農議定使二郎保追至臣等會盟之  
地使筆帖式傅昌同招撫噶爾丹使臣至將軍  
孫思克所將軍孫思克問明量事相機而行招  
撫二郎保於邊外見臣告曰我等至博碩克圖  
濟農會盟之地見之於哈爾噶圖地方議後博

碩克圖濟農撥其馬尼好青寨桑什保阿兒達爾寨桑等八人與之帶來臣等問馬尼好青寨桑等曰濟農教汝等作何言馬尼好等答曰濟農語我等云爾等到後曉諭噶爾丹汝口稱奉佛之法喇嘛之道而所行並未嘗遵達賴喇嘛訓誨我一則係親戚而年又長汝凡事俱遵中華皇帝之旨行可也臣等於是仍照前議令筆帖式傅昌等往交將軍孫思克而來就臣等疏至

上以示議政大臣續將軍孫思克奏言厄魯特噶爾丹克惡不肯歸化

皇上震怒調遣大兵噶爾丹敗遁目下困窮已極歸降無路今青海蒙古大頭目博碩克圖濟農遣使欲說噶爾丹降皆博碩克圖濟農震懼

天威欲圖報効也但當遣與否臣見識淺鮮不敢擅便  
伏候

上裁至招撫噶爾丹之事關係重大臣何敢輕自差小

人使之說降乃河州副將李鳳祥遣其通事馬  
一善至青海博碩克圖濟農處偵探消息即謂  
博碩克圖濟農於噶爾丹為親當使說噶爾丹  
歸降臣於此不勝駭異臣並無此言奏至

上命議政大臣集議議曰博碩克圖濟農欲遣人招撫  
噶爾丹者雖係彼効力之意然噶爾丹之降與  
不降皆在

皇上恩威於博碩克圖濟農遣人往說無涉也況已發

大兵兩路進勦追討噶爾丹則博碩克圖濟農遣人之事相應停止以上項原由明諭將軍孫思克及博碩克圖濟農之人遣回至副將李鳳祥但當差人至青海偵探至招撫噶爾丹乃國家大事李鳳祥輕自差人與博碩克圖濟農商議殊為不合應檄該將軍查明到日再議

上從之

命緩議根敦什希卜罪鄂爾多斯固山貝子根敦什


希卜來請

安進貢奏曰王董羅卜令本旗發兵三百名因馬匹羸瘦不能如數但率兵一百而來奉

旨不許貝子根敦什希卜進貢交該部及議政大臣集議來奏議曰查根敦什希卜旗下有二十一佐領選好馬之兵三百名無不可得之理況關係軍機甚為緊要擅自短少殊為藐玩應將根敦什希卜革去貝子扎薩克將短少之兵仍行補

至奏八

命暫緩議根敦什希卜之罪回京再奏其兵依議速  
令往調



聖祖仁皇帝親征平定朔漠方略卷四十

# 欽定四庫全書

史部

平定朔漢方略卷四十一

二

詳校官編修

臣曹振鏞

編修

臣裴謙覆勘

總校官進士

臣繆琪

校對官中書

臣鮑之鍾

謄錄監生

臣許紹錦



欽定四庫全書

聖祖仁皇帝親征平定朔漠方略卷四十一

乙丑

訓諭武臣撫恤兵丁

上御行宮召川陝總督吳赫西安副都統阿蘭泰寧

夏總兵官王化行原任總兵官王潮海馮德昌

副將高永乾許萬道員吳秉謙遊擊胡琨姜奇

陳良弼張高張法鄧茂公叅將馬濟入

賜食進諸臣而

訓諭之曰朕往者未嘗臨邊不獲目覩邊地之苦今  
巡行至此視沿邊地方百姓土瘠人貧但兵丁甚  
精銳黃河以西榆林一帶城池兵丁比他處實勝  
然而兵雖良必有撫綏訓練之人乃克有濟如不  
善撫綏而困苦之則兵雖良無用也善撫綏者不  
扣取兵丁應得錢糧如數支給自足養其身所謂  
養兵之道即此是矣若不知撫恤雖多給國帑兵

丁斷不能沾實惠爾等武臣出身行伍者多豈有  
不知兵丁之苦者乎一旦居官頓忘在昔為兵之  
苦而扣剋糧餉于心何忍今雖末員當計日後漸  
臻大任可不存良心愛惜兵丁乎朕又聞營中虛  
懸兵數冒食錢糧各處皆然陝西尤酷此雖不可  
全信大略皆如是也且或聞朕來現招以補足原  
額者亦有之總之爾等督撫提鎮俱當盡心體恤  
下寮爾等若不受餽獻則下寮不致貧苦下寮既

不貧苦則斷不剝兵而虛冒扣剋矣爾等大小官員各有俸祿養庶衣食並無所缺倘扣剋虛冒即罹于罪關係利害不輕即今總兵官柯彩練兵甚精前亦曾經効力後以操守不佳致人疾怨朕撤柯彩回京大都武臣之中勇敢果毅出力効用者多而操守潔清者少或慎于履任之初而渝于後者亦有之趙良棟性格雖與人不相合而操守甚佳恢復成都之時亦嘗有所掠取然而不甚悖理

及復雲南秋毫無犯此亦彼強於人處也以此觀之武臣之中如趙良棟者可謂良將矣爾等居官俱當法之但不可傲其驕矜耳又聞總兵官師帝賓操守甚清居官如此雖身後而軍士尚愛戴之凡有功而人强者朕皆擢用矣但一時聲名無不佳者日久而變節者多此皆年齒漸增貪貨賄計身家而然坐此失者比比也爾等其遵此訓旨通行曉諭又

諭大學士伊桑阿曰著將出征五百綠旗兵賞銀各  
二兩今即頒發查隨駕兵丁應給行糧至何月為  
止來奏至庫勒納解來駝騾着與兵部同閱具奏  
命減兵覈餉進追噶爾丹

上諭將軍馬思喀等曰今噶爾丹窮迫已極兵多則用  
之不盡而進發亦覺繁重此但用護軍鎗手六百  
前鋒五百烏拉兵四百綠旗兵五百二千兵即足  
矣前鋒烏拉兵俱已派出應給伊等馬駝之數俱

已奏訖護軍鎗手驍騎礮手伊等馬四匹外再各  
增給一匹即取所留四百兵內之馬以為五匹除  
有駱駝之兵外無駱駝兵丁每二人合給駱駝一  
頭將所需駝馬及所攜四個月米數查明算奏議  
政大臣等僉曰

皇上睿慮所及

諭旨已極周詳皆當謹遵行之應將前鋒八百內連  
前鋒校發五百名留二百九十七名前鋒叅領

侍衛盡行派出所發前鋒五百名以每人各馬  
五匹算所需馬二千五百匹除有駱駝之一百  
二十二人外其三百七十八人以每二人合駱駝  
一頭算所需駱駝一百八十九頭將護軍鎗手  
一千內發六百名留三百九十四名每旗有實  
授叅領二員委署叅領六員以此于所留軍中  
每旗留署叅領一員所發署叅領護軍校四十  
員以每人現騎官馬四匹算共馬一百六十匹



護軍六百名以每人各馬五匹算共需馬三千  
匹除有駱駝之二十九人外其五百七十一人  
以每二人合駱駝一頭算所需駱駝二百八十五  
頭又所餘一人給馬一匹後增發聽差四員請  
停增馬以每二人合駱駝一頭算所需駱駝二  
頭帶來

景山礮二門停其帶往每旗帶來子母礮三門各  
留一門此所留之礮每旗各留叅領一員驍騎

校一員小校及驍騎十名每旗帶往之礮各二  
門各發叅領二員驍騎校二員八旗小校驍騎  
一百六十名伊等亦以每人各馬五匹算所需  
馬八百匹以每二人合駱駝一頭算所需駱駝  
八十頭馱礮之馬五十六匹駱駝三十二頭將  
烏拉兵四百全發此內夸闌大八員伊等以每  
人各馬六匹算前鋒叅領六員驍騎叅領十六  
員伊等以每人各馬五匹算散騎校五員筆帖

式一員伊等以每人各馬四匹算兵四百名伊等以每人各馬四匹算所需馬一千七百八十二匹共官三十六員以每人各駱駝一頭算兵四百名以每二人合駱駝一頭算共需駱駝二百三十六頭將軍薩卜素增給駱駝四頭馬一百十八匹綠旗兵五百名本身馬各一匹再各增二匹為三匹算所需馬一千五百匹以每二人合駱駝一頭算所需駱駝二百五十頭其護

軍校前鋒護軍鎗手驍騎礮手及馱礮之馬共  
需馬六千五百十七匹將所留之前鋒護軍驍  
騎礮手馬內擇其肥者抵換帶往其烏拉官兵  
四百所需馬一千七百八十二匹及增給將軍  
薩卜素之馬一百十八匹將學士朱都納所喂  
之馬撥給其綠旗兵五百所需馬一千五百匹  
將其所駐綠旗兵之馬內擇其肥者帶往前鋒  
鎗手護軍驍騎礮手馱礮聽差人員烏拉官兵

綠旗兵共需駱駝一千七十八頭將尚書庫勒  
納等解到駱駝一千一百三十七頭及捐助駱  
駝四百頭撥給共二千四百九口每口一月以  
倉斛二斗算所攜四個月米共需一千九百二  
十七石二斗奏入

上曰可聽差人員不必帶往又

諭侍郎安布祿曰充使出差察哈代之妻吳罕子阿  
木尊察陵三口在吳喇忒公達爾馬什里旗下副

都統阿林袞家著諭該部乘便行文送張家口交  
郎中滿都可也

陝西總督吳赫請自內地

回鑾

不許吳赫奏曰近奉

旨

駕巡邊外竊思西安府乃歷代帝王建都之地名山大  
川古聖賢之舊蹟甚多路坦易行且臣自西安

來時沿途耆老軍民聯羣結隊向臣言曰我陝  
省連年大旱無收百姓俱至流離

皇上好生如天蠲免歷年錢糧特差大臣賑以

帑金運致米糧以甦民命家給牛種使之稼穡陝  
省百萬餘人此數年收獲得以更生者皆

皇上之浩蕩宏恩也我等小民無以報答但日祝  
萬壽無疆而已今

皇上經理軍務臨幸邊境祈至西安諸處使我等瞻仰

天顏叩謝

再造之恩稽顙籲請臣已許其轉達而來祈

皇上俯憫兆民顙望之誠從內地回

鑒

上曰朕臨寧夏原為調兵以滅噶爾丹也今噶爾丹尚  
未就擒朕由邊外往相機而行于此一舉務成大  
事不得從內地行吳赫又奏曰陝西幅帟遼濶關  
隘險要臣等守斯土者雖諸事皆遵



上諭施行不能仰副

聖意之事多伏祈

皇上親臨指授實於地方有益且陝西流離之民蒙

皇上殊恩今已盡還原籍安生樂業

皇上務乘此便幸臨閱視

上曰陝西距京甚近至無事之時朕當特來也吳赫又

再三懇請

上竟不允

庚寅

厄魯特台吉阿喇卜灘丹津俄木布遵

旨絕噶爾丹先是遣筆帖式黑色長史馬尼圖等賫  
勅往撫厄魯特台吉阿喇卜灘丹津俄木布至是大  
將軍伯費揚古等奏言准侍郎滿丕咨稱閏三  
月初四日出差厄魯特筆帖式長史馬尼圖等  
還言職等正月十八日至阿喇卜灘所居布顏  
圖郭兒河見阿喇卜灘夫婦授以

勅書宣

諭旨畢阿喇卜灘言我請奉

聖旨遷向策旺喇卜灘住阿兒台地方與丹津俄木布

同候

聖旨俟我使歸有何

諭旨當遵

旨而行阿喇卜灘使人諾顏格隆臧布阿喇卜灘之  
妻之使人阿旺達什及其偕來之厄魯特羅卜

臧達爾漢哈什哈丹津俄木布妻父之使人察罕台吉之使人臧布及其偕來之厄魯特八人回子七人婦人幼童九口與職等同于二月十八日起行前來職等到彼授以

勅書見阿喇卜灘夫婦言語一摺乞交驛遞送等語又阿喇卜灘等使人言阿喇卜灘丹津俄木布察罕台吉各有一奏摺是以令諾顏格隆臧布乘驛起行外併將黑色馬尼圖奏摺發去等因

據此令督驛員外和尚往迎黑色等先發黑色  
等奏摺呈

覽其奏摺內言臣等奉

旨於正月十八日至阿喇卜灘所居布顏圖郭兒河  
遣告阿喇卜灘以我等前來之故阿喇卜灘遣  
人迎臣等入阿喇卜灘家接

旨之時阿喇卜灘夫婦皆跪恭敬捧受臣等宣

聖諭訖阿喇卜灘答言

聖上勅書內令我及丹津俄木布不得與噶爾丹同處  
若不相疑可即前來務使爾等得所若或相疑可  
往附策旺喇卜灘勿居額黑阿喇爾齊什希洪郭  
羅之地

勅書內開有丹津俄木布及我二人之名理宜我二  
人同覆

聖旨柰丹津俄木布先在洪郭羅之地後聞丹津俄木  
布自洪郭羅出居垂地汝等若往路遠而有盜

賊我當遣人至丹津俄木布處我則仰遵

諭旨移於近地希沐

皇恩但我下人難以遷移噶爾丹又現居其間難以前  
往我仰遵

上諭移往策旺喇卜灘國界居住同丹津俄木布候  
旨今我使人臧布諾顏格隆與汝等偕往一唯

聖上有何

諭旨請遵

旨行之阿喇卜灘之妻言吾母吾弟沐

聖上隆恩俱得其所矣聞

聖上眷恤迥異於諸喀爾喀我不勝歡忭感戴丹津俄

木布使人羅卜臧達爾漢哈什哈于二月十八

日至臣等處告曰丹津俄木布居于垂地聞

聖上勅書天使到來極其懼怖欲來而路遠春時馬瘦

不能前來謹繕疏覆

旨令我等賫捧而來同汝等往使臣黑色馬尼圖於



二月十八日率阿喇卜灘使人臧布諾顏格隆  
丹津俄木布使人羅卜臧達爾漢哈什哈等起  
行而來矣阿喇卜灘疏言自厄魯特喀爾喀交  
惡以來我輩附從博碩克圖汗之事已在

皇上洞鑒中而

聖度如天俯恤臣等

諭使離博碩克圖汗臣已離之奉

皇上勅諭如不信朕可往投策旺喇卜灘

大君

慈旨真實不虛臣有何疑但臣向居阿兒臺是以遣使于策旺喇卜灘之時已與丹津俄木布同往阿兒臺居住嗣後伏祈

垂鑒如長江流水加惠不絕丹津俄木布疏言傳諭諸國同歸禮好如岡如陵永遠堅固不勝欣悅臣亦伏佛天覆庇平安得歸本地矣又云臣向因博碩克圖汗恩如慈父是以勤護宗門附從

同行其時厄魯特喀爾喀禮信未墮儼然安好  
自是以後所行不合臣心不服即出歸吾土矣  
皇上仁明海量撫養我地往降之人同普天生靈咸俾  
得所是以奏請為我等調劑嗣後伏祈

垂鑒如恒河江流加以

仁惠察罕台吉疏言聞

皇上萬安不勝欣忭臣于此地與丹津俄木布俱佳茲  
遣臧布阿兒達爾俄木布往請

皇上萬安伏祈

大君鑒恤侍郎安布祿為之呈奏

上以示議政大臣咸曰阿喇卜灘等所差使人諾顏格  
隆臧布等賫來進

上之物及交市之物俱留於邊哨外侍郎滿丕處應將  
所留人畜貨物及進

上之物俱取至歸化城伊等俱著滿丕予附近部落酌  
量撥人送至歸化城交都統等存視俟去使歸

日再議

上從之尋筆帖式黑色等至

上前面奏後

上諭議政大臣曰著將阿喇卜灘使人諾顏格隆臧布  
額爾克俄木布阿旺達什令送往侍郎滿丕處于  
彼地所留人內聽彼酌帶二十許人而往其途中  
病留丹津俄木布使人達爾漢哈什哈羅卜臧之  
缺填回子盆楚克拜之名其偕來察罕台吉使人

阿兒達爾俄木布之名填于勅內即令彼帶回達爾漢哈什哈羅卜臧既已身故著長史馬尼圖還伊等既到滿丕處前去之時著滿丕于附近部落酌取馬駝乾糧等物給足遣之其餘人員帶來貨物俟伊等去後再行請旨

大將軍伯費揚古以撥發官兵嚴備喀倫事奏聞費揚古奏言准侍郎滿丕咨稱閏三月初四日喀倫送到厄魯特恩克言我乃格壘之人隨格壘

## 來降

聖主之時中途被伊拉古克三庫圖克圖所掠前行二  
日至訥墨黑圖地方住二十餘日我乃竊他人  
馬鳥鎗一桿逃出我前在彼處出入伊拉古克  
三庫圖克圖左右其下人大小共有百人伊拉  
古克三庫圖克圖言欲在厄濟內古爾喀尼居  
住盜黃河崖邊居人馬羣職滿丕隨遣人移文  
喀爾喀扎薩克公吳巴達萬舒克台吉圖巴丹

津額爾德尼等令將彼旗下人速收入內其扎薩克本身協理台吉都統副都統酌量帶兵各在本旗地方加意防備將各旗探哨遠行設立又移文黃河三哨協理台吉令速遣喀爾喀副都統阿穆呼郎遠展哨探謹慎預防等因看得伊拉古克三庫圖克圖窘迫已極未必不至喀爾喀所居界上行竊是以臣等發察哈爾哈兵一百五十衆扎薩克蒙古兵一百五十交散秩



大臣吳巴什郎中諾木齊代往駐喀爾喀所居  
界上形勢之地如伊拉古克三庫圖克圖前來  
行竊爾等即行撲勦擬於閏三月初七日發行  
俟大兵自寧夏起行日期部文到臣撤回吳巴  
什所領兵為此奏

聞

上以示議政諸臣

命遣大臣監發將軍薩卜素官兵馬駝

上諭黑龍江將軍薩卜素曰所給爾等官兵之馬何日  
給發著與議政大臣會議來奏奏後朕遣人閱選  
給發議政大臣議撥給將軍薩卜素官兵馬駝擬  
於十二日給發撥給之後尚有數日屯劄仍請  
給支草料

上從之遣公福善親隨侍衛關保侍衛阿兒柱馬什閱  
選駝馬給發

送格壘沽英等妻子至歸化城大將軍伯費揚

古咨理藩院曰康熙三十六年三月二十八日  
侍郎滿丕處解到降人格壘沽英婦女童穉十  
口曼濟婦女童穉四口馬五匹駱駝二頭鳥鎗  
二桿撒袋一副已交驛遞解至歸化城往交副  
都統阿廸等因侍郎安布祿為之傳奏

上以示議政諸臣是日格壘沽英祁薩木到

辛卯

上誠諭督撫提鎮愛兵恤民

上諭陝西總督提督巡撫總兵官等曰朕宵旰勤民慮  
周遐邇緣向來巡幸未經親蒞邊境頃特濟河而  
西循秦省沿邊地方延覽風俗諮詢疾苦見所在  
兵民築土屋以為居耕沙磧以為業生聚之計甚  
屬艱難朕惻然於衷軫念弗釋因思兵民倚賴全  
在將吏而將吏之表率惟督撫提鎮是視誠使督  
撫提鎮實能正己澄源則所屬守職奉公祿足自  
贍必無腹削兵民之事若積習相沿濫受屬員私

饋因而所屬官弁節次索取償於下文則加徵  
無藝武則侵扣月餉勢不至于厲民剥兵不止如  
此而欲冀其疾苦日蘇生聚日盛烏可得乎夫秦  
地俗尚素稱簡樸邊方士卒允屬精銳總恃撫馭  
得人斯於兵民胥益朕茲駐驛寧夏特召諫省總  
督總兵官以下官員凡在鎮城者俱賜宴行宮面  
加諄諭無非期望文武大吏董率屬員以仰副朝  
廷愛兵恤民至意自今以後爾等其益體朕懷交

相砥礪文官皆習知民事豈身作官吏不恤百姓之依武職多起自行伍豈甫為將領遽忘軍士之苦上官克謹廉隅屬吏各遵法紀馴至比屋殷阜列戍飽騰則兵民皆得其所而爾等亦與有休寵以視厲民剝兵身名俱隕者孰得孰失爾等其敬念之特諭

分撥進勦駐防官兵

上諭議政大臣曰前着孫思克博濟發兵三千但兵多

則進發繁重今應選出滿洲綠旗兵二千以所留  
兵丁之馬增給之令攜四個月糧遣赴阿南達所  
阿南達李林隆率之搜勦孫思克博濟率所留之  
兵暫駐甘州其于成龍等糧運守候之地亦應令  
兵一枝駐劄此着西安副都統阿蘭泰率西安兵  
三百往戍其留于寧夏之京營前鋒每旗二十名  
護軍鎗手礮手酌量派出隨駕餘駐寧夏撥一大  
臣領之着大將軍伯費揚古傳諭附近部落蒙古

王貝勒貝子公台吉等有願自備四個月糧隨軍  
効力者許其前來其費揚古軍前所有黑龍江兵  
一百俱全帶來量四個月口糧選發察哈爾兵攜  
四個月米來會于郭多里巴爾哈孫地方即令總  
管此軍至費揚古起行後着舒恕代理其事侍郎  
滿丕仍駐原戍之地可即會議具奏議政大臣議  
奏曰調遣兵馬諸務

皇上一一籌畫



聖諭已極周詳俱應敬奉而行俟

命下之日檄將軍舒恕孫思克博濟提督李林隆副  
都統阿南達侍郎滿丕令各遵行自寧夏前往  
京軍於厄黑阿喇兒地方搜剿噶爾丹糧馬已  
撥等事亦俱檄之費揚古阿南達可也議入

上報可尋大將軍伯費揚古等奏言現在軍前者有喀  
爾喀達爾漢親王諾內毛明安貝勒班第毛明  
安扎薩台吉諾爾布本旗協理台吉博木布吳

喇忒扎薩克公杜稜吳喇忒扎薩克公鄂爾奔  
本旗協理台吉吳爾圖那蘇圖吳喇忒公達爾  
馬什里本旗署協理台吉勞章什喇卜喀爾喀  
察哈爾台吉額爾德尼納木占三盤扎卜車克  
巴汪扎兒三濟扎卜諾爾布阿喇卜灘達木甘  
在附近地方者有喀爾喀和碩親王善巴喀爾  
喀扎薩克台吉吳爾占之協理旗務二等台吉  
顧穆濟卜閒散台吉龔格汪扎兒圖色拉克衛

徵帶青噶木楚克祁他特車卜登達什陳木布  
納木占率其護衛附丁前來籲請情願各帶自  
已四個月糗糧赴軍前効力其他部落情願前  
往効力之王貝勒貝子公台吉等俟來報之時  
彙齊報部奏入

命示議政大臣續有喀爾喀土謝圖汗其養子台吉  
濟克巴願從軍効力貝勒額爾德木圖額駙班  
第台吉畢力克喀爾喀扎薩克一等台吉巴郎

之子台吉汪布四等台吉薩馬代俱願從軍効  
力奏入

上准隨征

命撥大兵食羊議政大臣奏曰是月初九日欽奉

上諭着將行糧給寧夏進勦官兵副都統阿蘭泰所買  
羊從多隨趕除給兵丁行糧外查阿蘭泰所買羊  
一萬六千五百內擇臙肥者五千隨目下寧夏  
進勦兵而行此係隨軍克糧之羊應交將軍馬

思喀等分授八旗綠旗兵趕去其所剩一萬一千五百羊仍交地方官看守俾其採買

上曰買此羊者原為是軍之備剩之何為着將羊全給是軍食此羊可多行數日矣

理邊內邊外運糧安站事

上諭議政諸臣曰朕曾以轉運糧餉及隨軍安站之事與鄂爾多斯貝勒宋喇布議之彼奏言當此有青草之候以臣等帶來兵三千足供運糧安站之用

應將白塔以外運糧安站事交宋喇布同于成龍等商議而行白塔以內運糧安站事交總督吳赫管理其西安副都統阿蘭泰兵三百亦交與于成龍又馬思喀帶來之兵若祇自費口糧一月則其餘三月之糧及隨軍所運之糧為數甚多船運一次未必能完勢必再運一次大兵豈能空坐久待應令馬思喀兵各費兩月口糧外所餘之米船裝運往船裝不盡者令大小官員均派拴帶而往若

復有所餘令于成龍竭力運致白塔此間食過十二日米於衆人均派拴帶米內取之補給隨軍遞運之米應至何地應止何地着大將軍伯費揚古議政大臣與于成龍等會商定奪着詳議具奏議曰噶爾丹困窮已極仰承

皇上指授則進兵運米必無遲悞請令將軍馬思喀兵拴帶兩月糧計二千一十五石大兵自白塔以外拴帶二千一十五石二斗于成龍等隨運一

月之米一千零七石六斗共米五千三十八石  
大將軍伯費揚古所帶黑龍江兵一百其察哈  
爾兵不知數目大約連黑龍江兵作一千算一月  
需米二百二十石西安副都統阿蘭泰兵三百  
取西安留下兵之馬三百匹增給前進兵每人  
一匹拴帶兩月糧二百六十四石八斗其三個  
月口糧三百九十七石二斗令于成龍運往其  
運米官員軍校坐臺章京筆帖式五個月口糧



需六百八十七石因米糧必多備帶往始為有益應連耗米帶一千九百石大將軍伯費揚古兵西安兵運米人員口糧及多帶之米共三千五百石除將軍馬思喀等拴帶米外船裝運往之米三千二十二石八斗儘船裝往如船裝有餘着大小官員拴帶再有多餘令于成龍等馱運其船運之米應派地方官七員于成龍處司官二員管押前進自白塔陸運撥牲口四千五百

匹并駕三牛之車預備三百輛帶往每二輛合用三人此所需人役四百五十口糧鍋帳併催值等項照去年中路例交該督給發所派出船上地方官七員即從彼地管車夫給口糧帶去其米應運至何地留止何地既着大將軍及叅謀與于成龍會同商定則給發大兵所餘駱駝亦交于成龍率鄂爾多斯兵二千二百五十名將米遞運前進其安站之事將于成龍帶來理

藩院司官派出一員率鄂爾多斯兵七百五十名隨將軍馬思喀而往依其所指之地安設自寧夏至白塔所設十站交總督吳赫料理外自白塔以外至額黑阿喇兒共五十站每站安設一臺每臺設鄂爾多斯兵十五名馬二十匹或叅領或驍騎校安設一員伊等俱係蒙古不通滿文每臺將通滿文者或章京或筆帖式安設一員使管理驛站之務着于成龍與宋喇卜公

同商議而行

上報可總督吳赫奏曰查寧夏至平樂城一百里其間  
應設兩臺平樂城至白塔四百餘里其間應設  
八臺此十臺每臺應設馬二十五匹揀選守備  
千總把總等官一員及領旗等頭目二員安設  
所建內地之臺取偏僻地方驛馬安設邊外之  
臺照甘肅例取營馬安設其臺臣請親視建立  
上從其言且謂地方事重大吳赫不便往設驛站着大

學士伊桑阿侍郎哈雅爾圖安布祿安設驛遞要  
務安設不可差悞

台吉羅卜臧之妻以其所獲厄魯特獻

上理藩院奏曰巴圖爾厄爾克濟農之侄羅卜臧台吉  
之妻告云察哈代親子索諾木達克巴色稜吳  
巴什察哈代親兄巴兒當吳巴什其妻索諾木  
素其子羅卜臧津巴多爾濟達什剛阿塔爾扎  
木素女車林剛阿塔兒之妻庫磨扎卜此十口

俱在我家又格壘沽英之屬下顧魯黑夫妻二子共四口亦在我家察哈代乃効力于

皇上之人其子弟及格壘沽英之人我皆獻之

皇上從外而往則甚遠從內則近請使我之人同部中人出邊口取來乞給驛于伊等使之前來奏入命差廣武游擊之人同其人往取俟到日每口給銀三十兩

厄魯特扎木素來降侍郎滿丕奏曰厄魯特扎

木素來降告云我於三月初三日自哈薩克圖  
哈喇阿濟爾罕地方逃來當在薩克薩特呼里  
克時一日晚間忽有牛駮聲三響衆皆聞之隨  
有一瀚海傍採捕之人夜中來告噶爾丹云我  
乃瀚海旁採捕之人霧瀾瀚海視其飛塵有兵  
馬蔽地而來噶爾丹營中人自此擾亂衆人俱  
言向聞滿洲行軍必放三礮扎營今敵人近逼  
是真遂遷往哈薩克圖哈喇阿濟爾罕我從行

十六日於哈薩克圖哈喇阿濟爾罕地方見噶爾丹又差塔兒巴配以十人往瀚海旁驗視正擾亂之時我夫妻騎馬三匹逃出來降

皇上又丹濟拉離噶爾丹另遷于三日程外什爾哈戈必地方噶爾丹遣人兩次往召之丹濟拉言既有程布臧布矣用我何為我不去也又曾遣土克齊色稜達什于杜哈爾阿喇卜灘我來之前同土克齊色稜達什前去之人之馬畜杜哈爾



阿喇卜灘之人奪取之棄四五人于額黑阿喇  
兒但兩三人步行而歸土克齊色稜達什言阿  
喇卜灘所有

中華皇帝使臣來將同使臣遣阿喇卜灘之使及行商  
回子去觀阿喇卜灘之狀與我反顏是實又聞  
西路有阿南達兵防守又有根敦帶青滿兵已  
圍取洪郭羅口是以噶爾丹不知所往在阿兒  
臺四圍游行欲往阿兒臺之陽則山險而無野

獸欲踰阿兒臺往額黑阿喇兒則畏杜哈爾阿  
喇卜灘據此將扎木素同格壘沽英曼濟及其  
妻子併馬駝什物俱交驛站遞送至歸化城發  
副都統阿第安插奏至

上命示議政諸臣

壬辰

遣使宣

諭噶爾丹等先是大將軍伯費揚古以博什希出使

噶爾丹之事來報

上諭侍郎安布祿曰爾可令驛站星速馳迎博什希驛  
站筆帖式不論何地遇博什希取噶爾丹奏章先  
星速賚來令博什希量力隨後馳來將噶爾丹奏  
章令驛站筆帖式小心賚來恐致墮失併遣人迎  
丹濟拉使人羅卜臧及我此地所差使人巴兒通  
阿什曼濟兩人日夜星速帶來驛站先將噶爾丹  
奏章及使人送到其噶爾丹疏言欽惟

皇上

大慈普惠有如衆母光明鑒照不異幽明奉到

勅書及使人格壘沽英口傳

諭旨不勝懼忭大都言語文章百凡音節雖不能灼

知亦常有所陳奏間者各項情事蒙普惠

大慈文殊皇帝仍惠加

諭旨雖臣意中有

聖旨甚是之想但為大兵所敗四處離散目下此地才

遺猶未相商是以大畧雖謂

聖旨甚是而以諸凡所奏情事已遣格壘沽英往奏俟  
格壘沽英到後明白密奏如

皇上俯恤准奏垂鑒則大幸矣正欲遣格壘沽英啓行  
而忽逃亡是以遣喇木扎卜前往令喇木扎卜  
明白口奏喇木扎卜奏曰噶爾丹言

聖旨云汝不能自活則收衆近徙來降我居無廬出無  
騎食無糧我屬下阿喇卜灘杜爾伯特之車陵

滾占之子車陵多爾濟俱不能自活散去捕獸  
不及召集伊等諮問其意俟集問之後再行另  
奏緣

皇上有恤臣之語是以臣屬下人等歸投  
皇上者甚多伏乞發還臣所併乞

聖上加恩賜于失所之人以活其命奏畢

上曰汝欲歸乎抑留此地乎喇木扎卜奏曰臣原欲來  
投

皇上去歲夏間帶四十餘人而來遇杜爾伯特之車陵  
盡皆劫去是以不能來而返自此噶爾丹謂臣  
有反心防至此時格壘沽英逃後臣有心告請  
而來

聖上問臣所願臣之妻子俱在此地臣無所往也必使  
之去

君事也何敢不去于是

上諭內大臣索額圖明珠曰大兵起行之前當遣人招

撫噶爾丹丹濟拉此差不必遣本朝之人與塞卜  
騰巴兒珠爾同擒者有噶爾丹乳母之子丹濟扎  
卜再撥願往之厄魯特賚勅而往一面遣使一面  
進兵達賴喇嘛身故已十有六年矣第巴指達賴  
喇嘛之旨以誑噶爾丹噶爾丹信其誑自言為達  
賴喇嘛之教而恣肆橫行以此等事明開勅內照  
樣刊刻多印付丹濟扎卜等傳示併遣諭策旺喇  
卜灘令乘此會亦興兵剿滅之事明白開列議政



諸臣開列出使策旺喇卜灘部院人員職名入奏  
上命派出工部侍郎常綬侍讀學士伊道及革職侍郎  
多奇暫補主事同往此等事若不効力伊等更於  
何處効力今草已青著自備馬匹前去至是大學  
士伊桑阿奉

旨撰

勅諭噶爾丹策旺喇卜灘丹濟拉厄魯特之台吉寨  
桑哈什哈及衆百姓四道呈

覽

上謂四道勅文雷同無異自始至末手為改定以示議

政諸臣

勅諭噶爾丹曰

皇帝勅諭噶爾丹博碩克圖汗去冬命爾早降則予以  
富貴給以資產眷顧煦育之即爾所屬厄魯特之  
衆亦各得見其妻子遂其生業故遣使偕格壘沽  
英往宣勅旨今使者喇木扎布至覽爾所奏謂未

明朕旨且觀爾辭意一無真實而請給還來奔之  
厄魯特豈惟厄魯特之衆雖爾子塞卜騰巴兒珠  
爾及爾乳母俱已被獲今皆恩養與徽特和朔齊  
同居爾若來歸即令爾子與爾相聚今既不降爾  
有何功遂還爾厄魯特之衆爾欲歸降應及早來  
若不歸順徒遷延時日何益況達賴喇嘛已故朕  
已知之曾嚴飭第巴第巴又遣尼麻唐庫圖克圖  
上表來賀捷且奏稱達賴喇嘛已歿十六年其轉

生之庫必爾漢年已十五歲則爾之指稱達賴喇嘛以為護法欺誑衆人者已顯露矣爾所欲逃匿之地厄魯特來降者多朕已悉知即使遁入洪郭羅險固之地諸路皆可進剿爾困迫若此尚何力拒守即今已無歸所矣今歲即不擒汝來歲當覆發兵追討必不中輟汝其詳審之故遣丹濟扎布察罕代舒魯等賫旨特諭

勅丹濟拉曰

皇帝勅諭台吉丹濟拉朕為天下元后善善惡惡乃至  
理也去歲遣格壘沽英等歸勅內開載爾名復使  
格壘沽英傳諭今格壘沽英等來爾之辭意皆已  
備陳爾今能致噶爾丹博碩克圖汗來降必當封  
為貝勒畀以殊榮如不能致爾一身歸順亦能不  
失富貴况爾以下之人先降者皆釋其罪顯榮優  
養爾應悉聞已往之過槩不介意爾曾密奏若宥臣  
罪臣請投降故特專賜勅旨盡宥前罪勅到其速

降朕為大君豈改成命特諭

勅厄魯特之台吉寨桑哈什哈并其人衆曰

皇帝勅諭厄魯特之台吉寨桑哈什哈并部落人衆等  
朕無分中外皆欲其各安生理樂育昇平至於誅  
戮征伐原非本懷爾厄魯特等附從噶爾丹博碩  
克圖汗所在侵掠雖有所得於人而已之祖父戰  
死妻孥被掠者亦云衆矣今所餘之人不被創受  
傷者甚鮮死亡之餘其存幾何因從噶爾丹博碩

克圖汗以致窮迫困苦已極屢頒諭旨命噶爾丹  
博碩克圖汗前來歸順爾厄魯特之衆朕俱養育  
使得其所而噶爾丹博碩克圖汗並不以爾衆為  
念不思歸順他日兵臨則爾衆難免俘戮故特諭  
厄魯特之衆爾能各携族屬妻子來降者朕皆養  
育使得其所前所降者已加恩養爾衆亦當聞之  
矣特諭

勅策旺喇卜灘曰

皇帝勅諭策旺喇卜灘爾歷來請安納貢克恭克順朕亦加眷顧恩施頻及噶爾丹奸詭性成雖彼至戚靡不嫉害既將厄魯特之四部喀爾喀之七旗致令破亡分裂又以追襲折布尊丹巴士謝圖汗等為名侵我邊境屢擾不已朕因於去歲數道遣兵親行征剿直抵克魯倫土喇地方大破噶爾丹陣斬甚衆其妻亦被誅戮冬間復遣兵西出哈密地方獲其子塞卜騰巴兒珠爾等今窮迫已極所屬



大小寨桑哈什哈等相繼來降者不絕其餘附從  
之人及寨桑等流離逃散俱欲投順密報前來今  
噶爾丹僅餘孑身率領數人隨處飄遁爾當亦聞  
之矣爾前奏稱噶爾丹若近逼我土必竭力擒剿  
又言隨聖上指示効力盡瘁等語噶爾丹克惡已  
極有如魑魅斷不可留今數道遣發大兵搜討夫  
噶爾丹與爾素有不睦乘其困迫應起兵復讐進  
剿且達賴喇嘛亡故已久第巴欲詐飾達賴喇嘛

尚在之狀故嚴飭第巴而第巴大懼遣尼麻唐庫  
圖克圖來言達賴喇嘛亡故已十六年其再生後  
身已十五歲據實陳奏則噶爾丹所稱護達賴喇  
之法者其為欺誑衆人也明矣欲爾明悉故特  
遣工部侍郎常綬內閣侍讀學士伊道侍衛克什  
圖等賫勅諭汝且加恩賜賞彩緞十端特諭

議政諸臣讀之奏曰四諭經

皇上撰為四體即刻改成辭意俱別各與彼情事脗合

洵極神妙雖典謨所載何以加茲且諭噶爾丹  
所屬台吉寨桑等

勅內指明其失語語皆係實事

天章炳赫燦若日星人人覽之無不感動臣等以為  
諭旨到日噶爾丹之衆必皆潰散矣

上曰此甚屬緊要不可稍緩如寫蒙古字人不足著於  
侍衛執事人內查有通蒙古字者命連夜抄寫百  
張明日即行遣發著各處速行傳諭併給噶爾丹

丹濟拉使人丹濟扎卜等乘歸馬匹著議政大臣  
議奏議曰噶爾丹丹濟拉使人丹濟扎卜察哈代  
羅卜臧舒魯俱各給馬二匹駱駝一頭丹濟扎  
卜馬夫一名察哈代馬夫一名此二人俱各給  
馬二匹伊等口糧米麵帳鍋碗碟及駱駝鞍屨  
俱自總督吳赫處支給其馬駝俱于督運于成  
龍處取肥者給與將伊等交與往拏伊拉古克  
三庫圖克圖之內大臣策旺諾爾布護軍統領

杜什希等至郭多里巴兒哈孫地方遣之前去  
上報可

命遣大臣往擒伊拉古克三庫圖克圖先是大將軍  
伯費揚古報伊拉古克三庫圖克圖欲往黃河  
崖盜馬發兵防禦

命散秩大臣巴當阿護軍統領孫扎齊散秩大臣策  
旺諾爾布護軍統領杜什希等各率官兵分兩路  
往擒伊拉古克三庫圖克圖大臣章京侍衛兵丁

所乘馬匹著議政諸臣議奏至是議曰往擒伊拉古克三庫圖克圖由郭多里巴爾哈孫之路進發者大臣三員侍衛二員厄魯特侍衛一員新滿洲四十二名厄魯特十八名西安兵五十九名大臣各帶從人三名侍衛各帶從人二名厄魯特侍衛一員原有從人一名新滿洲四十二名各帶從人一名大臣併侍衛六員每人馬三匹共用馬十八匹新滿洲四十二名厄魯特十

八名從人五十六名每人馬二匹共用馬二百  
三十二匹合計用馬二百五十匹將學士朱都  
納所喂馬撥給西安兵五十九人亦各帶從人  
一名每人各馬二匹共馬二百三十六匹將西  
安存留馬撥給由西路進發之散秩大臣巴當  
阿等自此處給與驛馬前到彼地亦照此騎馬  
前去移文將軍孫思克博濟等俱照定例將營  
內馬撥給前去大臣官員侍衛所領滿洲兵計

定從人一名綠旗兵但計本身撥與馬匹此兩路進發官兵俱著賚四十日糧奏入

上從其議

遣厄魯特恩克歸招撫滾占之妻諾洪達喇及其子車陵多爾濟先是

上諭議政諸臣曰遣使噶爾丹時著遣丹津扎卜察哈代舒魯恩克丹濟拉來使羅卜臧等去至恩克乃滾占之子車陵多爾濟人著與偕往應至何處分路



使至伊主車陵多爾濟處去至是

諭侍郎安布祿曰著遣滾占之妻之人恩克隨明日  
前去之散秩大臣巴當阿等乘驛至侍衛阿南達  
所令阿南達交哈密城頭目達爾漢白克給從人  
一名往撫伊主滾占之妻著理藩院行文諭滾占  
之妻諾洪達喇子車陵多爾濟云爾之恩克自哈  
密城擒解前來今遣還汝所汝等如欲降當即前  
來斷不可與噶爾丹和好毋以爾夫曾與我軍交

鋒被創為懼朕非欲得爾之人衆也若欲奔策班  
喇卜灘可即前往朕不介意若欲奔青海則我軍  
現在西路朕賜爾文持往令彼放行

癸巳

諭大將軍伯費揚古定期進兵

上諭議政諸臣曰著檄大將軍伯費揚古由寧夏進發  
大兵于閏三月十七日起行費揚古可率其兵四  
月初十日外十五日內赴郭多里巴爾哈孫地方

命護軍統領鄂克濟哈查報厄魯特降人撫養之

上諭行兵部曰護軍統領鄂克濟哈駐居寧夏著將現在厄魯特男婦子女三十八口交鄂克濟哈伊等食物照常支給嗣後厄魯特由此路來者俱令鄂克濟哈收養寧夏來降及各處解來厄魯特著鄂克濟哈報明男婦子女人名新從噶爾丹處來及緊要人開明年貌數目送赴行在提取某人據所指名字解送至鄂克濟哈處撫養之厄魯特應送

歸何處俟勅下遵行

酌撥隨

駕官兵馬駢實數議政大臣奏曰留駐寧夏之前鋒二百九十七名護軍鎗手三百九十四名驍騎礮手八十名伊等所有之馬或二匹或三匹共一千八百二十五匹內前鋒一百六十名護軍鎗手二百名隨

駕前去以每人各馬四匹算共需馬一千四百四十匹

應將留駐人員之馬撥給其留駐寧夏之前鋒  
一百三十七名護軍鎗手一百九十四名驍騎  
礮手八十名共四百一十一名伊等亦以每人各  
馬四匹算共需馬一千六百四十四匹將彼所  
剩馬三百八十五匹存下所缺馬一千二百五  
十九匹請將學士朱都納寧夏靈州中衛固原  
等處所喂之馬二千八百五匹內給之又增給  
西安兵五十九名者乃西安留駐兵之馬五十

九匹其缺額亦以朱都納所喂馬給之一等侍衛法諾三等侍衛博多齊伊等每人各馬五匹護軍叅領額訥布馬四匹共馬十四匹亦以朱都納所喂馬給之應給法諾博多齊之駱駝二頭以前停給聽差人員之駱駝二頭給之應給額訥布之駱駝一頭以庫勒納解到駱駝給之京來侍衛護軍執事人員共騎官馬一千五百八十三匹此內馬一百六十九匹侍衛護軍已

騎赴軍前者其馬不必更換其餘一千四百一十四匹盡行換給此換給之馬亦以朱都納所喂馬給之若朱都納固原所喂馬在起

駕前不及取來而馬不足以西安留駐兵之馬給之俟固原馬到日照數給還西安兵查官馬倒失疲留外其出征滿洲侍衛護軍坐馬一百六十九匹與所餘馬一千五百四十七匹俱係京城各佐領所養官馬不可濫動應交從

駕前來之察哈爾官兵于水草善地放養隨

駕後帶回京城交兵部各還本佐領朱都納所喂餘馬

五十九匹庫勒納等解來駱駝十頭併交將軍

馬思喀帶去給大將軍費揚古總督吳赫採買

平涼靖寧州所有滿洲綠旗兵之馬共九千五

百五十匹副都統阿蘭泰等採買捐助平涼等

處所有駱駝七十頭馬一百八十七匹騾九十

九頭尚書庫勒納等解到駱駝一千一百三十七



頭都御史于成龍等處捐助駱駝四百頭除給  
大將軍伯費揚古駱駝十頭現今進發之兵駱  
駝一千七十九頭外尚餘駱駝四百四十八頭  
庫勒納等解到騾三千六百三十一匹于成龍  
等處捐助馬騾一千四百六十匹驢六十七頭  
共計剩駱駝五百一十八頭馬騾一萬四千九  
百二十七匹驢六十七頭奉

旨依議隨駕自京騎官馬前來之侍衛護軍執事人

等俱賚兩個月糧著將庫勒納等解到騾子每人各給一頭俟至白塔將臆大者令于成龍領去其臆瘦者發還庫勒納等

命查駐兵營房給還民間先是以寧夏蘭州宜設兵駐防將民居圈取建造官房至是

上諭議政大臣曰寧夏蘭州設兵駐防事屬無益此所佔營房原係民居其房仍歸原主爾等其同總督議奏議曰噶爾丹困迫已極滅在旦夕寧夏蘭州

設兵駐防無益

上諭極當應將寧夏蘭州設防之兵停止查寧夏駐防  
兵丁建造住房之時所圈民房共五千九百六  
間新造房一千二百一十八間應交地方官將  
房還本主其蘭州建造房舍亦照此例

上從之

甲午

寧夏紳衿兵民懇留

聖駕

上不允寧夏紳衿兵民聞

御駕於次日啓行擁集

行宮外叩首奏曰

皇上欲安邊塞生民

躬親勞瘁俯臨寧夏臣等幸得瞻仰

天顏屢沐

聖恩今聞

車駕於十五日啟行臣等犬馬戀

主之心不勝激切伏乞

聖駕復留數日以慰羣情

上曰朕欲掃蕩寇氛以安黎庶特幸寧夏經理軍務駐蹕十有餘日曩者南巡及凡所巡幸之處未有駐蹕至三日者且邊地磽瘠民生艱苦朕深憫之朕扈從人衆恐多留一日即滋百姓一日之擾朕已定十五日啟行爾等誠懇之意朕已知悉又向者

曾欲使禁軍駐防此地恐民間居處狹隘已命將  
房舍查明給還本主爾等即各遷回故居可也衆  
聞之俱歡呼奏曰

皇上親臨寧夏子愛百姓扈從官兵毫無侵擾且商賈  
各多獲利又恐臣等居處狹隘查還房舍

皇上浩蕩之恩如天地之高厚臣等俱叩謝

聖恩又奏曰寧夏實係邊塞窮荒

皇上躬親臨幸誠千載一遇乞製

聖訓頒賜臣等勒之貞珉光垂萬禩臣等子孫世世瞻仰

上曰朕巡幸原欲安民今製文頒賜則百姓運碑僱匠轉致煩苦不必製文賜給准其謝恩衆復叩首請曰此處百姓聞

車駕親臨已預備碑材本地現有工匠不至多費若得

聖訓勒之貞珉則天下四方之人咸來瞻仰於地方永

有光輝陳請再三

上命內閣大學士伊桑阿等議奏僉曰臣等伏惟寧夏  
閣城人民叩請

皇上親製聖訓光垂永久其瞻雲望日之意殊為誠懇  
皇上親製聖訓令其敬勒貞珉垂示無窮洵為盛事奉  
旨訓旨候頒給於是紳衿兵民人等於

行宮外叩謝

聖恩踴躍歡忭聲震天地



覆覈兩路進兵糧餉馬匹驛站事務

上諭大學士伊桑阿曰着將所議兩路進兵追剿噶爾丹之事撥置馬匹糧米之事設站之事俱查來朕將覆覈之伊桑阿俱查呈

御覽

上全閱畢

諭曰各項事務議論區畫俱已詳盡今噶爾丹無所逃矣噶爾丹或降或自盡不必為我所擒朕將親

至船站視兵馬起行暫駐蹕於彼地聽其聲息倘有朕當親行之事則行之伊桑阿奏曰此役追剿噶爾丹之事

皇上每日執筆書記區處備禦噶爾丹去路已極周密備儲我軍資用又極豐裕誠如天羅地網噶爾丹無所逃矣不久當如

聖諭所云也

定將軍叅謀諸臣

上諭將軍馬思喀曰著都統侯巴渾代齊世將軍薩卜  
素都統兼前鋒統領碩鼐護軍統領宋住總兵官  
王化行俱為叅謀既與大將軍伯費揚古會將軍  
馬思喀亦為叅謀至總兵官王化行去歲出征噶爾  
丹之役見其人材矯健隊伍整齊尤著勞勩大將  
軍伯費揚古來亦奏其功綠旗總兵官向無受為  
叅謀之例著王化行于此役軍中為叅謀賜孔雀

翎

命趨設驛站

上諭大學士伊桑阿曰朕明日向白塔行凡報事者若俱自舊站至寧夏追赴則迂而且遠朕何地駐蹕即將舊站就行在所移趨前此之行尚書班第亦如此著侍郎安布祿依黃河西岍駐扎自總督處取船一隻撥理藩院賢能官二三員在侍郎安布祿處備之將外站每日向行在所移趨其站不足則再增嗣後從內出之事則出殺虎口由外新設

之站而來從外入之事則由新設之站馳入殺虎口其以此當大學士前傳諭如違誤者死侍郎安布祿甚糊塗著交明哈雅爾圖勿誤驛務議曰自湖灘河朔至橫城原設鄂爾多斯地方驛站十二處今

御駕移向白塔應差理藩院司官舍陵祁塔特薩木布代丹巴每日調移安站但調移之時兩站相去其間不無遼遠若所移站相去遼遠着前去司

官借近地旗分蒙古馬各二十匹暫行安設其  
新設十二站內亦未必無馬瘦缺者現有橫城  
以前邊內大站所增馬二十匹腰站所增馬十  
匹即將所增之馬著前去司官就近調取每站  
增馬二十匹奏入

命於此處撥殷實十二人安站其馬瘦缺之四站人  
員爾等議奏復議曰請撥此處殷實十二人遣往  
安站其馬瘦缺之四站人員調回嚴加議處著

所撥殷實十二人接馬好之八站獨取正道安  
二十站此殷實十二人撥四人頂六十六巴圖  
蘇達祖興邦之缺所餘八人間雜增列查前者  
設站每站取近地部落首領一員兵五名理藩  
院或筆帖式或小校一人無設應除六十六等  
往替之四人外其八人亦照前每人撥近地部  
落首領一員兵五名給之理藩院帶來筆帖式  
小校各處差遣所存無幾應檄在京理藩院或

筆帖式或小校撥八人星速遣來與伊等同設此殷實之人交移站四司官計遠近相水草自湖灘河朔至白塔取正道安設

上從之

調撥運米牲口議政諸臣奏曰據于成龍等奏稱大兵于十七十八日起行請將米自二十日陸續起運補捐牲口雖有二千餘未全收完尚書庫勒納等解來三千六百騾子內已令給騎官



馬之侍衛護軍執事人員各一匹倘運米四千  
五百之數有所不敷請將寧夏綠旗之馬充數  
帶往俟後捐人員之馬到後該督收取補還兵  
丁應將督運于成龍及尚書庫勒納等解到騾  
子內除給騎官馬之護衛護軍執事人員外所  
剩騾子之內有可用者俱令運米如尚不敷四  
千五百之數交與該督令于寧夏綠旗兵內足  
數用之俟後捐人員之馬到後該督收取補還

兵丁其收取數目另行報部奏入

上從之

傳諭官兵牧馬之法

上諭上駟院侍衛馬什曰馬匹應作何拴放著與蒙古台吉等會議具奏議曰

上用額馬係喂料肥馬當拴令至曉其給衆騎用之馬俱經寧夏喂料當於日暮飲之拴至五更始放其自京騎來之瘦馬不必節其水草略令休息

即行收放

上曰甚善著開寫傳示該管大臣其兵丁人等亦通行曉諭

聖祖仁皇帝親征平定朔漠方略卷四十一